

Առ 1 յուլիս Հայաստանի Վարկային Կօօպերատիւնների Միութիւնը — Հայվարկը, ունէր 23 անդամ ընկերութիւններ. 12,121 անդամով, 530,640ր. դրամագլխով. ընդունւած աւանդը հասնում էր 1,142,812ր.: Փոխառութիւն էին կնքել 103,175ր. և անդամներին մինչև յունիս 1 փոխատուութիւն արել 815,350ր.: Յիշեալ 23 ընկերութիւններից 10 հին գործող ընկերութիւններ էին, 11 վերաբացւած, իսկ 2 նոր հիմնւած: Այդ 23 ընկերութիւններին Հայվարկը 10,900,000ր. վարկ էր բաց արել, որից առ 1 յուլիս օգտւել էին 7 ընկերութիւնները՝ 1,500,000 ռուբլու: Կառավարութիւնը Հայվարկին տրամադրել էր 40 միլիոն ռուբլու վարկ: Հայվարկն ընդունում էր առանց սահմանափակման աւանդներ և ընթացիկ հաշիւներ ու անարգել վճարում էր ինչ գումար և պահանջէր: Իր անդամ-ընկերութիւնների համար Հայվարկը տպագրել էր կանոնադրութիւն, մատենաներ, պատրաստել բլանկներ ու դիւանական պիտոյքներ և այլն:

Նոյն եռանդն ու կենդանութիւնը տեսնում ենք և կեանքի միւս ասպարէզներում: Ապրիլ 20-ի նիստում կառավարութիւնը որոշել էր կադմել միջվարչական յանձնաժողով՝ արագացնելու համար կառավարական մի շարք գործառնութիւնների փոխանցումը գաւառական ինքնավարութիւններին: Յանձնաժողովի նախագահ էր նշանակւել ներքին գործոց նախարարութեան տեղական ինքնավարութիւնների և քաղաքային բաժնի վարիչ Հ. Մելքումեանը, անդամներ գիւղատնտեսական նախարարութիւնից՝ Ստ. Կամսարականը, աշխատանքի՝ Վ. Բաբայեանը, խնամատարութեան՝ Ռ. Քաջերունին, հանրային կրթութեան՝ Պ. Ստեփկեանը, արդարադատութեան՝ Յ. Ամիրխանեանը, հաղորդակցութեան՝ ինժ. Մելիք-Շահնազարեանը, երեմտական՝ Պ. Զաքարեանը, Երևանի գաւառային ինքնավարութեան նախագահ Յ. Թադէոսեանը: Միջվարչական յանձնաժողովը մի շարք նիստերում մշակել էր այն պայմանները, որոնց հիման վրա գաւառային ինքնավարութիւններին պիտի փոխանցւէին կառավարական մի շարք իրաւունքներ ու հիմնարկութիւններ:

Մինչև յունիս 1 արդէն պետական բոլոր տարրական դպրոցները, բոլոր հիւանդանոցներն ու բժշկական կայանները, գիւղատնտեսական տեղական պահեստները, սերմանման մարմիններն ու գիւղատնտեսական կայանները, միլիցիան և այլն փոխանցւած էին գաւառական ինքնավարութիւններին, որոնք հետզհետէ կարևոր տեղ էին գրաւում պետութեան կեանքում: Մասնաւորապէս յաջող գործունէութիւն էին ցոյց տալիս Երևանի և Էջմիածնի գաւառական ինքնավարութիւնները:

Արդարադատութիւնը զարգանում էր անկանոն պայմաններում: Սովորական դատարանները չէին վերացւած, բայց դատերի մեծ մասը տեսնւում էր արտակարգ դատարանների միջոցով: Մայիս 14-ից մինչև սեպտեմբերի սկիզբը Հայաստանում 234 քաղաքական բանտարկութիւններ էին կատարւել, որոնցից 120 հոգի ազատ էին արձակւել, 3 հոգի դատապարտւել մահապատժի և բանտերում մնում էին՝ 15 հոգի բանտարկութեան դատապարտւած,